

FPP BizNewz

June - November 2022

MANAGEMENT • INVESTMENT • ECONOMICS • ENTREPRENEURSHIP • TECHNOLOGY

Endometriosis

Sejauh Mana Kesedaran Anda?

Personal Shopper

What You Need To Know

Sustainable Packaging in eCommerce

A Few Solutions to Protect the Planet

Type text here

How To Teach Your Children To Pack Their Backpacks For Travel? An Easy Guide

A Short Vacay in Hat Yai

My Sister, My Best Friend

Kredit Mikro di Malaysia

H0BI



Publication Date
8 November 2022

Photo by Matt Chambers on Unsplash

MASYARAKAT ETNIK MELAYU RAWA

Oleh:

Siti Fatimah Mardiah Hamzah, Suhaily Maizan Abdul Manaf, Fathiyah Ismail, Salwani Affandi, Nur Azwani Mohamad Azmin, Nik Noor Afizah Azlan, Sholehah Abdullah
Fakulti Pengurusan dan Perniagaan, UiTM Cawangan Terengganu

***"Riringgiek Tebang Jo Olang
Tebang Mombubuong ko Udaro
Dari Sungei Soriak ko Gunuang Molintang
Tosobuik Luhak Tanah Rao"***

Pantun dialek Rao diatas menceritakan kekuasaan Masyarakat Rao suatu ketika dahulu di tanah Sumatera Barat. Masyarakat Rao berasal dari sebuah daerah kecil Rao, Mapat Tunggul, Daerah Pasaman, Sumatera Barat, Indonesia. Daerah kecil Rao merupakan wilayah rantau minang dan menjadi sebahagian dari kerajaan Pagaruyung sejak abad ke-16. Namun di Malaysia, etnik Rao lebih dikenali dengan panggilan Rawa. Penggunaan istilah Rawa di Malaysia dipercayai bermula daripada Haji Abdullah Noordin al-Rawi yang mengasaskan syarikat percetakan dan penerbitan Persama Press pada tahun 1921 di Lebuh Aceh, Pulau Pinang. Perkataan "ar-Rawi" digunakan dibelakang nama bagi menunjukkan asal-usul seseorang, mengikut kepada cara orang Arab yang meletakkan nama tempat dimana berasalnya seseorang itu di hujung nama mereka. Perkataan "ar-Rawi" bermaksud dibangsakan kepada "Rao" tetapi lama-kelamaan sebutannya bertukar menjadi "ar-Rawa" merujuk asal daripada daerah "Rao", di Sumatera. Menurut Prof Dr HM Bukhari Lubis (Universiti Pendidikan Sultan Idris) dan Afriadi Sanusi (Universiti Malaya), sebagaimana yang ditulis di dalam buku Bingkisan Sejarah Raub Rao Dan Pagaruyung: Pertaliannya Dengan Raub Dan Pahang, melayu Rao ini ditakrif sebagai beragama Islam, bermastautin di Rao, berasal dari keluarga Rao melalui hubungan darah atau persemendaan tanpa batas sempadan, berbahasa Rao dan mengamalkan adat budaya Rao. Dikatakan juga mereka ini masih dalam lingkungan suku Minang dan mengamalkan Adat Perpatih. Sungguhpun begitu, terdapat juga sumber lain yang mengatakan bahawa masyarakat Rao bukan berasal dari Pagaruyung atau Minangkabau kerana terdapat bukti-bukti tinggalan sejarah yang menunjukkan Rao adalah

negeri tertua jika dibandingkan dengan daerah-daerah lain di Sumatera. Dikatakan mereka ini berasal dari suku bangsa Lubu yang akhirnya berkembang menjadi orang melayu. Suku ini datang ke Rao pada abad ke-6 dan mengamalkan sistem kasta yang kemudiannya berubah menjadi suku. Dikatakan orang Mandailing di Sumatera Utara juga berasal dari bangsa Lubu yang sama seperti Rao.

Dewi, S. F., Saifullah, S., & Yulika, F. (2020) pula di dalam buku mereka Serba Serbi Perantau Rao (Rawa) Malaysia, mencatat penghijrahan masyarakat Rao ke tanah melayu bermula seawal abad ke-5 lagi. Namun terdapat juga penulisan yang dirujuk berkenaan penghijrahan ini yang merekodkan kedatangan mereka bermula pada abad ke-15 ketika era perdagangan bebas zaman Kesultanan Melayu Melaka. Aktiviti perdagangan ini menjadi faktor penggalak kepada orang Rao untuk merantau, berdagang dan seterusnya bermastautin di sini.

Setelah berhijrah ke Tanah Melayu, mereka membawa haluan masing-masing dan meneruskan kehidupan sebagai pedagang, petani dan pelombong. Ada yang menetap di Selangor, Perak, Kedah, dan Pahang. Sumber dari Zaffuan Hj. Manap (2019) merekodkan penghijrahan masyarakat Rao bermula pada 1773 hingga 1848 ke Negeri Sembilan, 1857 hingga 1863 ke Pahang, 1867 hingga 1873 ke Selangor dan turut terdapat sebilangan yang membuka penempatan di Kelantan. Namun, perpindahan besar-besaran mereka bermula setelah daerah Rao ditakluk oleh Belanda pada 1833 dan meletusnya perang Padri. Kehadiran mereka ke tanah melayu membawa bersama budaya dan adat resam tradisi yang masih diamalkan sehingga kini serta kekal sebagai identiti unik masyarakat ini. Secara fizikalnya,

penampilan mereka tidak banyak berbeza dengan Melayu Malaysia, cuma bahasa pertuturannya berbeza iaitu seakan-akan Minang.

Masyarakat Rao sejak di tanah asalnya Sumatera sememangnya terkenal sebagai pedagang, oleh itu perhijrahan mereka banyak dipengaruhi faktor ekonomi selain dari faktor peperangan. Kerancangan aktiviti perlombongan emas di abad ke-17 Masihi dan bijih timah di abad ke-18 juga turut mendorong sebahagian besar pelombong Rao ke Tanah Melayu melalui negeri-negeri selat. Kepentingan ekonomi dipercayai mendorong kepada pembukaan penempatan mereka di kawasan yang luas peluang perniagaan serta kaya dengan sumber alam semulajadi seperti emas, timah dan hasil hutan. Ini juga merupakan salah satu sebab kepada dominasi penempatan mereka ditemukan dikawasan yang suatu ketika dahulu terkenal dengan hasil perlombongan bijih, emas dan pertanian seperti di Raub yang terkenal dengan aktiviti perlombongan emas. Malah dikatakan nama daerah Raub itu sendiri berasal dari perkataan Rao yang lama kelamaan disebut sebagai Raub. Walaupun begitu, terdapat juga sumber lain yang merekodkan daerah Raub mendapat nama dari aktiviti 'meraub' atau mengaut emas di tebing sungai Raub. Manakala di Perak, penempatan mereka bertumpu di daerah dan kawasan yang dibuka berikutan aktiviti melombong dan pertanian seperti di Kampar, Gopeng, Temoh, Tapah, Selama dan sebahagiannya di Tanjong Malim. Manakala di Selangor pula, masyarakat ini dominan di Hulu Selangor seperti di kawasan Kalumpang. Terdapat juga sebilangan masyarakat Rao yang bermastautin di kelantan, khususnya jajahan Pasir Mas, yang dikatakan berhijrah ke negeri Cik Siti Wan Kembang

melalui Pahang.

Selain faktor ekonomi dan pertanian, faktor geografi dan sosial juga menyumbang kepada penghijrahan dan pemilihan penempatan masyarakat ini. Mereka dikatakan mencari kawasan muka bumi yang mirip dengan tempat asal mereka dan daerah yang telah ada ramai suku bangsa mereka. Lokasi yang dipilih agak tersorok di sebelah hulu dan selamat dari ancaman musuh seperti di Hulu Pahang dan Hulu Selangor.

Warisan budaya kesenian, makanan dan adat Masyarakat Rao telah mewarnai kepelbagaian etnik di Malaysia. Selain budaya yang unik, sumbangan tokoh-tokoh ilmuan dari kalangan masyarakat Rao, seperti Hj. Yusof Rawa misalnya dan pahlawan pejuang kemerdekaan berketurunan Rao seperti Mat kilau juga turut tercatat dalam lembaran sejarah negara. Ringkasnya, dari mana pun asal mereka, masyarakat Rao di Malaysia pada hari ini telah berasimilasi dengan budaya setempat dengan baik di samping masih mengekalkan tradisi asal dari seberang.

Rujukan:

Abdul Hamid, F. & Jalani, H, (2018), Haji Yusof Rawa dan Penerbitan Majalah al-Islah (1970-1974), Jurnal Usuluddin 46(2): 147-166

Abdullah, S., & Fathil, F. (2021), Revisit the History of Early Settlements in Pulau Pinang: The Contributions and Legacies of Rawa People. Intellectual Discourse, 29(2).

Dewi, S. F., Saifullah, S., & Yulika, F. (2020), Serba Serbi Perantau Rao (Rawa) di Malaysia, Gre Publishing, Ikatan Penerbit Indonesia, Yogyakarta, Indonesia.

Fathil, F., Sulong, W. S. W., & Manaf, N. F. A. (2018), Rawa Migration to The Malay Peninsula in the 19th Century: The Case of Pahang, Perak, And Selangor. *Al-Shajarah: Journal of the International Institute of Islamic Thought and Civilization (ISTAC)*, 27-50.

Manap, Z. (2019), Bingkisan Sejarah Raub Rao Dan Pagaruyung: Pertaliannya Dengan Raub Dan Pahang, Pusat Warisan Intelektual Negeri Pahang, 2019-04-26 00:45:01

Misteri Etnik: Melayu Rawa - Part 1 (2010), <http://laman-seri.blogspot.com/2010/08/misteri-etnik-melayu-rawa-part-1.html>

Panitia Teromba Keturunan Rawa Setanah Melayu https://terombarawa.blogspot-com.translate.goog/2008/12/sejarah-rawa-di-tanah-melayu.html?_x_tr_sch=http&_x_tr_sl=ms&_x_tr_tl=en&_x_tr_hl=en&_x_tr_pto=sc

Rosdi, N. M. (2017). Kesenian Warisan Islam Dan Budaya Pahang. *International Journal of Creative Future and Heritage (TENIAT)*, 5(1), 74-102.



BizNewz 2022
Faculty of Business and Management
Universiti Teknologi MARA Cawangan Terengganu, Kampus Dungun
Sura Hujung, 23000 Dungun, Terengganu, MALAYSIA
Tel: +609-8400400
Fax: +609-8403777
Email: biznewzuitm@gmail.com